



25. september 2025

UKA2025/17

Uunga siunnersuut: Nioqqutissanik eqqussuineq annissuinerlu pillugit Inatsisartut inatsisaata allanngortinneqarneranik Inatsisartut inatsisaat. (Nunatsinnut angalasunik nakkutilliineq kiisalu aningaasanut atoriaannarnut il.il. killiliussamik appaaneq)

(Aningaasaqarnermut Akileraartarnermullu Naalakkersuisoq)

Siumumiik Naalakkersuisut qujaffingerusuppagut inatsisissatut siunnersuummut.

Naalakkersuisut nioqqutissanik eqqussuineq annissuinerlu pillugit Inatsisartut inatsisaannik allanngortitsiniarnerat assigiinngitsunik tunngaveqarpoq. Siumumiillu isumaqarpugut aaqqiissutissatut suliarineqarsimasut inatsimmi tunngavimmini paasinartut.

Siullertut nunatsinni angalasut akitsuutsitaqanngitsunik nassataqarnersut ilanngaaserisuniit immikkut ittumik misissuiffiqineqarsinnaanissaat pisinnaatitsissummik peqalerifigineqassasoq anguniarneqarpoq. Tassa imaappoq Nuummi mittarfiup illutaata nunanut allanut angalasut aammalu nunatta iluani angalasusut ataatsimut illorsuarmi utaqqisarfimmi ataatsimi katersuuttarnerisa kingunerisaannik ilanngaaserisut pisinnaatinneqarnissaat, suliaqarnerulernissaannik malitseqassasoq inatsimmi ersippoq. Allatut oqaatigalugu, mittarfiup illutaata torrallataangilluinnarnerata titartaasimasullu Kangerlussuarmi misilittakkanik pitsaasunik aallaaveqarani kisiannili nunani allani pissutsit tunngavigalugit suliaqarsimaneramik tamanna aamma takussutissiisoq Siumumiit isumaqarpugut. Taamaattumik Siumumiit paragraf 37-inik apeqquteqaqattaarpugut, ernumagigatsigu aammalu ajoraluartumik ilimagigatsigu makkua ajornartorsiutaalersut siusinnerusukkut Kangerlussuarmi annerusumik ajornartorsiutaasimanngisaannartut Nuummi mittarfimmi ajornartorsiutaalersimasut malitsigisaat aamma Ilulissani Qaortumilu assinganik ajornartorsiutaalissasut.

Illorsuit sanaartorneqarnerini Siumumiit ilisimaaraarput Greenland Airport-imi pisortaausut naapinneranni ataasiarata apeqqutigisarsimallutigut, ernumasimagatta. Akissutigisarpaallu, naamik ajoqutaangillat nunani allani ajornartorsiutaasannngimmata assersuutigalugugooq Aalborgmi aporfionngilaq. Aasiilli massakkut piviusumik pigamik inatsisit malitsigisaat maanna maani Inatsisartuni naleqqussartussanngorpugut, illorsuit utaqqisarfiit torrallataangitsut nunatsinni kalaaleqatitsinnut iluaalliuutaasussanngorlugit misissuisinnaanissaq pisussanngoratsigu. Soormi taavaana nunatta iluani angalasussat immikkut nassataminnik tunniussillutillu aamma security aqqusaqqaanngikkaluarlugu aallariartortinneqartarunnaartut.

Inatsisip appaatut siunertaraa aningaasanik tigummiaqartarnerup 50.000 kr.-iniit 15.000 kr.-imut appaaffigineqarnissaa tamanna Siumumiit isumaqatigaarput. Siunertaammammi anngiortumik unioqutitsilluni eqqussuisarnerit unitsinneqarnissaat, soorlu ikiaroornartulerisut pasineqarlutillu akiuorneqarnissaat tunngavigalugu Inatsimmi aningaasanik tigummiaqartarneq



appartinniarneqarluni. Siumumiit tamanna tunngaviusumik paasisinnaagaluarlutigu isumaqarpugut aamma mianersorfissat mianerisariaqarigut. Tassami kalaaleqatigut aningaasanik tigummiaqartut “pinerluttunngorsannginnissaat” kikkullu tamaasa qernertuliormiit ingerlanerattut isigilnnginnissaat eqqarsaatigalugu. Tassami sulii kalaaleqateqaratta aningaasarivinni uninngasuuteqarnissartik salliutinnagu kisiannili nammineq tigummiaaqarnissartik pingaartitsisartunik.

Periarfissaerlu manna iluatsillu aamma Siumumiit Naalakkersuisunut apequtigivara paragraf 37 aqutigalugu ukiuni kingullerni aningaasat arsaarissutigineqartartut sumut karsimut nakkartinneqartarnersut. Tassami isumaqaratta taakkua aningaasat ukiuni kingullerni sisamani 24 mio. sinneqartut (ukiumoortumik politiit nalunaarutaat malillugit) nunatsinnut iluaqutaasunngorlugit inissinneqartariaqartut. Soorlu assersuutigalugu ilanngaaserisut atugaannut pitsanngorsaanernut, pinaveersaartitsinermut atorineqarnissaannut imaluunniit timersortartunut iluaqutaasussanngornerisigut.

Siumumiit ersarissumik oqaatigeqqissavarput ikiaroonartumik atuinerup nunatsinni annertuallaaleriartornera minnerunngitsumillu aanngajaarniutit sakkortunerit nunatsinni ulluinnaarsiuutinngoriartornerat sakkortuumik akiorneqarnissaanut Siumut ilungersorluni suleqataassammat. Kalaaleqaterpassuagut allaat meeqqat inuusunngunnguillu ikiaroonartoq peqqutaalluni sequtserneqartut tamatta akiornissaanut suleqataasariaqarnerput Siumumiit kissatigaarput.

Inatsisissatut siunnersuutit tunngavimminni paasinarput aammalu taakkua Siumumiit oqaloqataallutalu suleqataaffigissavagut. Kisiannili inatsisit pilersinnissaanut tunngaviusut tunuliaqutaasullu ilanngullugit taamak oqaaseqarfigalutigit, suliaasaq Aningaasaqarnermut Akileraartarnermullu ataatsimiisitaliamut ingerlateqqipparput.

Qujanaq.

Erik Jensen
Siumut